

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Što god mi radili i čime god se bavili, moramo biti svjesni da nas Uzvišeni Allah uvijek vidi i da Njegovi meleci bilježe sva naša djela! Što god radili i čime god se bavili, ne smijemo zaboraviti da će nas Uzvišeni Allah za to pitati! Što god radili, i čime god se bavili, ne smetnuti s uma da je Uzvišeni Allah Milostiv i da Njegova Milost je veća od Njegove srdžbe i da Njegova Milost nadvisuje sve!

On je Er-Rahman (Milostivi) prema svim bićima na Dunjaluku. I da nije takav, nas ne bi niti bilo. On, Uzvišeni, Najbolje zna!

Prenosi se da je Ibrahim, a.s., koji je poznat po gostoprimstvu, jednom prilikom u goste primio jednog nevjernika, ne znajući da je ovaj nevjernik. Pa kada je to saznao, odbio je da ga ugosti i ispratio ga iz kuće. Tada mu je Uzvišeni Allah objavio: **„O Ibrahime, Ja sam ovog čovjeka 60 godina hranio, iako znam kakav je, a tebi je on samo jednom došao, pa si**

**odbio da ga nahraniš.“** Tada je Ibrahim, a.s., vratio čovjeka u svoju kuću i ugostio ga, a ovaj je, nakon što je saznao zašto ga je Ibrahim, a.s., ugostio, prihvatio Islam.

Uzvišeni Allah je Er-Rahim (Samilosni) prema vjernicima na Sudnjem Danu. I da nije takav, naš život na Dunjaluku ne bi imao smisla. Međutim, vjernike znajući da je On Samilosni, tješi i pruža nadu činjenica da će On Svojom Milošću, prije ili kasnije, sve vjernike izvaditi iz Džehennema, dok će nevjernici, svjesni da će u Džehennemu vječno ostati, gorko zažaliti što Islam nisu prihvatili.

**„Zažalit će nevjernici često što nisu postali muslimani.“** (El-Hidžr, 2)

Kolika je Allahova milost dovoljno govori činjenica da je On samo 1% Svoje Milosti spustio na sve na Dunjaluku, a da je za Sebe zadržao ostalih 99%. Praktično, skoro da ne postoji djela koje Uzvišeni Allah ne može oprostiti. Pitanje je samo da li ih On želi oprostiti. Postoji samo jedan grijeh koji Uzvišeni Allah garantira da neće oprostiti, ako se čovjek iskreno ne pokaje, a to je ŠIRK. Allah najbolje zna!

Poslušajmo, braćo i sestre, jednu predaju koja govori baš o ovome. Naime, prenosi se da je među sinovima Israilovim u davno doba živio

jedan loš i pokvaren čovjek, toliko loš da se cijelo društvo okrenulo protiv njega i na kraju ga prognali iz grada. Ostao je sam, bez ičega, bez igdje ikoga. U takvom stanju ga je zadesila smrt. Pa je Uzvišeni Allah njihovom Poslaniku objavio: **„Jedan od mojih evlija (prijatelja) je umro, pa idi i ogasuli ga, a zatim mu organiziraj dženazu i obavijesti svoj narod da ću oprostiti svakome onome tko mu bude klanjao dženazu.“**

On je to učinio. I kada su se ljudi okupili i kada su htjeli da mu klanjaju dženazu, shvatili su da se radi o istom onom čovjeku, koga su oni zbog njegovih loših djela istjerali iz grada. Zatim se Poslanik obratio Gospodaru: *„O Allahu, pojasni mi ovu situaciju?“*, pa mu je Uzvišeni odgovorio: **„On je bio sam i ponižen i u svojoj samoći je postao svjestan svoje beznačajnosti. Nije imao nikoga, ni prijatelja ni rođaka, i kako je postajao sve slabiji a nije se imao kome obratiti, okrenuo se svome Gospodaru i rekao: 'O Allahu, kad bih znao da će se Tvoja veličina povećati ako me kazniš ili da će se smanjiti ako mi oprostiš, ne bih tražio da mi oprostiš. Ali, Allahu moj, pošto znam da se Tvoja veličina neće povećati ako me kazniš, niti**

*će se smanjiti ako mi oprostiš, tada, o Allahu, nemam se kome drugom obratiti osim Tebi, nemam nikakvu nadu osim u Tebe, nemam nikakvog skloništa osim kod Tebe, pa mi oprosti.' U ovom stanju je Moj rob umro, pa Sam mu oprostio. Ali, bio je uskog pogleda, pa je tražio oprost samo za sebe, a da je tražio oprost za cijelo čovječanstvo, kunem se Svojom veličinom i moći, cijelom čovječanstvu bih oprostio!"*

Braćo i sestre! Što god drugi radili, ne smijemo im uzeti pravo na nadu u Allahovu Milost. Što god drugi radili, ne smijemo im mi suditi, pa reći: „Ovome će Allah oprostiti, a ovome neće; ovome će Allah ukabuliti, a ovome neće; ovaj će ući u Džennet, a ovaj neće!“ Što god drugi radili, ne smijemo ih otpisivati, jer mi ne znamo - možda će se Allah njima smilovati, a nas u njihovo iskušenje dovesti. Ako su zaglibili u blato, treba ih izvući, a ne još dublje u blato gurati.

Braćo i sestre! U Islamu nema prebacivanja i podsjećanja na prošlost onome tko se pokajao i vratio Allahu. Na žalost, često oni koji u džamiju dolaze dugo prebacuju onima koji su odnedavno počeli dolaziti. Te on je radio ovo ili ono, išao

tamo, bio s tim i slično.

Braćo i sestre, tko god da nam dođe i kad god da nam dođe – dobro nam došao – jer došao je u stvari Allahu a ne nama! Vрати se Allahovoj vjeri a nije došao u neku stranku ili udrugu. On je brat musliman, ona je sestra muslimanka. Možda, čak, i na većoj deredži i stupnju kod Uzvišenog Allaha od nas koji smo svakog dana na sedždi i koji smo sebi umislili da smo već ušli u Džennet. **Nemojmo nikada to smetnuti s uma!**

Molimo Uzvišenog Allaha da nas uputi na Pravi put i sačuva od zabluda i stranputica. Amin!

ISLAMSKA ZAJEDNICA U HRVATSKOJ  
MEDŽLIS ISLAMSKE ZAJEDNICE SPLIT



**VRATA  
ALLAHOVE  
MILOSTI  
SU UVIJEK  
OTVORENA**

**506**

Prethodne hutbe potražite na našoj stranici: [www.medzlis-split.org](http://www.medzlis-split.org)

Pripremio: Vahid ef. Hadžić Split, 19.1.2018.